


剡原集
附札記
八



叢書集成

初編

主編者
王雲五

商務印書館發行

WD



001100530460

集 源 刻

記 札 附

(八)

撰 元 表 戴

剡源集卷第三十

律詩七言

送柯以善自杭遊鄂

江漢天風日夜清。君遊何處濯塵纓。雲從鸚鵡洲前出。月在鳳皇山上明。已羨經籀吳士豔。行看詞筆楚人驚。殘蓀賸芷將何用。歸日分張與後生。

讀福建廉訪輔大使弼字正匡遺事

臬官難稱是閩中。遺愛堂堂得比公。姓字丹青太史筆。歲時籩豆素王宮。一生薑桂那時辣。百死江湖必向東。從古仁賢有家世。名郎臺閣已生風。

客京口

酒醺花穠鼓聒天。百年成此好山川。黃煙暮接淮南火。白米秋攢浙右船。碑古猶多埋鶴寺。田高耕遍臥牛阡。陳蹤興廢何由問。只憶風流走米顛。

金陵贈友

虎變龍阡此一時。春風得似舊城池。宮閒軍賣偷來果。寺廢僧尋斷去碑。水水魚肥供白鮓。家家蠶熟衣

紅絲太平尙屬窮詩客。酒賤如泥醉不知。

湖山村

老去生涯學釣魚。溪山忽憶似湘湖。風林四畔動竿瑟。煙雨一篙行畫圖。小市篝明沽郭索。平園柵樹備於菟。偶然得住何妨住。是處人間足畏途。

己卯歲初葺剡居

休言聲迹轉沈淪。百折江湖亂後身。窮未賣書留教子。饑寧食粥省求人。坐來齒避樵蘇長。往處蹤迷木石鄰。番笑古來逃世者。標名先製隱衣巾。

耕桑

耕桑本是閒居事。學得耕桑事轉多。失曬麥叢憂出蝶。遲繰蠶繭怕生蛾。調停寒暖春移苧。偵候陰晴夏插禾。衣飯爲誰忙不徹。醉來乘興作勞歌。

秋盡

秋盡空山無處尋。西風吹入鬢華深。十年世事同紈扇。一夜交情到楮衾。骨警如醫知冷熱。詩多當國記晴陰。無聊最苦梧桐樹。攪動江湖萬里心。

王丞自鄞城歸又許入剡

江城醉別太匆匆。風雪家園一笑同。儘健不妨天子老。絕清那許鬼欺窮。簡書異日關誰事。燈火寒鄉賴

此翁幾度丁寧雞黍約。掃關拂榻誤兒童。

壬午清明

節序愁中都忘卻。見人插柳是清明。登陴戍出吹彈樂。上冢船歸語笑聲。解事濁醪相料理。當權團扇正施行。悲歡寒暑君休問。花鳥年年管送迎。

寒食

寒食清明卻過了。故鄉風物祇依然。窮中有客分青飯。亂後誰墳挂白錢。落魄暖春爲麥地。陰沈溽雨近梅天。閒情正爾無歸宿。石鼎新芽手自煎。

無題

板屋驟喧飛白蟻。紙窗欲雨暗蒼蠅。長勞井臼慚妻子。近絕音書惜友朋。夜半苦吟堪泣鬼。日高甘寢祇輸僧。意衰俗物何難敗。才薄天公卻未憎。

奉題孫使君池館

白髮使君經世材。儘閒猶解暢池臺。雜花屏障四時有。明月鏡奩三面開。各坐山隨人意看。正吟風遞鳥聲來。當年時雨堂前夢。得似從容此一杯。常州有時雨堂

家西十里外茅洋小山中土塚纍然初不封樹鄉先生舒文靖公墓也

莫輕數尺黃泥壤。埋卻斯人後更無。山上自難生毒草。樹間長見聚慈烏。樵耕可免憑鄉俗。灑掃能來是

學徒。後有宣尼須痛惜。待將墓額寫嗚呼。

戊子歲晚贈應德茂

江海悠悠雪欲飛。抱書空出又空歸。沙頭人滿鷗應笑。船上酒香魚正肥。塵土竟成誰計是。山林又悔一年非。平生萬卷應夫子。兩世知名窮布衣。

寶山寺寒食次韻和閔翁

綠陰啼鳥春將老。古寺垂楊日未西。客子欲歸風滿袖。桃花無語水流溪。有人蔬筍忘飢渴。何處松楸雜笑啼。準擬一時僧榻畔。詩翁題後更誰題。

戊子清明前陪王丞度新嶺

一百五日熟食節。七十一曲下山坡。寒暄相逢舊人少。風雨欲盡新林多。青巖不辭掛春靄。白鳥何處生滄波。塗泥同興不同調。我懶且休君更歌。

同陳養晦兵後過邑

搜山馬退餘春草。避世人歸起夏蠶。破屋煙沙飛颯颯。遺民鬚鬢雪毵毵。青山幾處楊梅塢。白酒誰家櫟柳潭。休學丁仙返遼左。聊同庾老賦江南。

送人遊霞嶼

霞嶼風煙接渺溟。老仙萬鍾敞林扃。峯前雁起湖雲淨。池面龍來海雨腥。閱世僧閒頭黑白。遊山客爽句

丹青何緣飛去清源國。雨夜條條著翅翎。

己丑正月六日袁季源家遭燬次韻書悶

鄴侯家裏新千架。杜老尊前屋萬間。此事吾堪慰流落。邇來天亦妒窮閒。反風待禱眞虛語。隕雨無方自厚顏。間挈殘家過西塢。風流還許幾生還。

正仲今年鄴城之約不就因次韻慰悅之

莫怪詩翁不出山。詩多那得是山間。清溪欲暖鶯啼樹。白日無人犬臥關。不惜野花簪素髮。時憑春酒轉朱顏。當年阮籍何曾達。直到途窮始哭還。

送于知州

居官難得是全名。于守年多政轉清。身爲素王扶墜戶。手提赤子出飢坑。使來公館文書簡。吏退私齋几硯橫。似此雍容好風度。天邊看著繡衣行。

壬午六月八日書懷

懷人故國鱗鴻絕。避地春園草樹長。四壁空存醫俗具。千金難售賣獫方。共兒坐誦脩吳語。有客行歌銜楚裝。昨夜見花搖作夢。南風吹海白茫茫。

杖錫寺

仙草漫漫路不分。鍾魚那許外間聞。涼天九月已飛雪。晴日西山猶帶雲。火後客誇新屋樣。兵前僧惜舊

碑文。藤湖只去招提頂。見說滌田可種耘。

四明山中逢晴

一岡一澗一縈隈。新歲新晴始此迴。莎坂南風兩蛤出。茅簷西日一禽來。人迷白路羊羣石。水捲青天雪裏雷。猶是深山有寒食。梨花無數繞巖開。

魏文節公墓

萬騎南來駐不留。衣冠客此鎮林丘。寒巖碎裂從中起。亂水喧鳴竟獨流。故物今惟存寓馬。當年誰爲指眠牛。墳傍小寺終村俗。畫柱紗籠護冕旒。

辛亥歲七夕醉陪諸公登西湖竹閣

畫鷁淩風汗漫遊。雨聲飛出萬山頭。江湖望闊邊城起。吳越音多客思柔。野樹有枝猶繫馬。官荷無葉不藏鷗。十年浪走紅塵道。今日臨城始識秋。

蔡奧食藕

地逢平處亦縈迴。不是逃兵底肯來。坡上一祠猶姓蔡。山前當路盡通台。高巖重去收桐子。鄰縣人過問藕栽。忽見深衣老儒者。清時不信少遺材。

辛巳歲六月三日書事

急報傳來又不真。迎門翁稚笑聲頻。情懷經苦思平世。顏貌緣愁似老人。兵後尙多難料事。山中誰是自

由身沙瓶酒醖鮭蔬有。領取燈花一樹春。

耕休

耕休何處散煩勞。東埭西梁信所遭。溪水清清照魚影。山風細細落松毛。無名野草疑皆藥。有韻村謠例近騷。稽古祇堪農圃用。莫將車馬誤兒曹。

畚齋次韻

貧賤知心老弟兄。祇疑相得似前生。避窮無地猶貪學。負謗如天底用名。兵後脫身宜共惜。書中薄業尙堪耕。殷勤預約頻頻見。未見亦須頻寄聲。

保福寺

漫天蘿蔓斷追尋。猶有人嫌未苦深。屋古滲當風雨氣。僧馴化得虎狼心。松花晝暖蜂科蜜。梅子春殘鳥戀陰。不應初來便忘去。身閒處處是山林。

張景忠學正之平江

江南最好說蘇州。傍得閒官也自由。市舍酒香春四坐。湖田租熟雪千舟。歌成爛漫烏絲寫。意到縈紆畫鷁游。我亦少年心性在。經從準擬作遨頭。

鮮于伯機家釣臺石

人間巖石亂紛紛。嚴子臺名最喜聞。何術縮渠千里脈。有人分得兩峯雲。天邊路遠星還動。江上潮回日

又曛解道泥塗等軒冕。東西更有范希文。

辛丑歲十一月二十六日東歸舟中示三子

節物悠悠不負公。江行三日雪花風。雲侵賀監山亭白。日在徐仙海島紅。自笑得雛如病鶴。也思結伴附歸鴻。何時辦得村田活。糲飯魚羹百指同。

歸自西關有作簡余率公鈔使

白髮微官小祝同。也隨年少踏春風。鄉心幾夜馬生角。世味一時龜脫筒。紅旆戍樓花整整。綠莎溪路水茸茸。歸來健羨余公子。卷帙如山一覽空。

貴溪董教諭回里

八月暄暄似小春。鄞江歸客楚江濱。夢中鱸膾紫蓴菜。晝裏紵袍烏角巾。不枉誇張別風土。有時吟嘯雜仙真。年高官滿身輕健。聊復婆婆亦可人。

陳無逸教諭赴攸州

白露西風湘水清。蒼霞南岳晚天明。離家休說三千里。行道新看第一程。橘味熟來思母遺。草名疑處教兒評。人生誰是安居者。早拾貂蟬映父兄。

周東鄉載酒冰溪上因遊岳祠醉作

葫蘆城下草平沙。狼牙峯前溪吐花。晴日路塵清野馬。空林人語亂神鴉。饒思火甕生燒筍。渴愛山爐熟

煮茶投老遠遊何所惜。爲君歡坐岸烏紗。

次韻東魯省游石龜山

一舸悠悠醉又醒。溪山無語意分明。龜身何日化蒼石。鶴背有人遊紫清。百榼頻空看少俊。千金難買是春晴。筵端宋玉尤騷絕。游戲長歌復短行。

寄趙子昂

溪上輕雲去若飛。花間密石靜相依。遲行自愛款段馬。雜坐誰嗔短後衣。江海於人元不薄。風流如此欲安歸。集賢學士吾兄弟。近日音書亦較稀。

亡友內翰趙公晦叔哀詩

振鷺庭中訂坐身。行藏空寄輓蒲輪。上來鬼泣荆山璞。獵罷人驚魯外麟。死肯扣閭排貴倖。貧猶傾橐施鄉親。平生一一明經術。雋永依然世澤新。

次韻答貴白

斗粟千錢不易酬。海風吹斷寄詩郵。誰家盛設蟹黃餅。有客翻披狐白裘。春樹自隨冬樹老。官河長挾野河流。隔生兄弟何須說。來作城南十日遊。

清華堂

人生隨分有清華。萬竹岡頭第一家。甃塹水溫初荇葉。粉牆風細欲梨花。衣冠蒼皓迎如畫。綳素朱黃積

滿車。從此儒林添膾炙。老夫先借小詩誇。

陸君采都目入閩

趨閩漸近解閩吟。公子來時夏欲深。捲地翠棚榕樹驛。漫天紅錦荔枝林。官庖雋永多珍膾。野語啁嘲有怪禽。風物自佳難逗遛。浙江歸棹待相尋。

亞尹黃侯慮囚溫處婺三州

金華瓊秀抵仙都。雁宕石門天下無。眼見朱幡出雲霧。手提丹筆洗焦枯。海魚味爽休多食。嶺馬程艱合緩驅。定有車前投贄者。幅巾麻褐是真儒。

簡湯及翁

六十三翁尙美髯。今年添盡白毵毵。心如晚路思家馬。身似春筐欲繭蠶。無事官曹容岸幘。有時書帙當清談。風情最苦湯公子。家世衣冠舊汝南。

舒子俊見過

來往通家不厭頻。青山心性白雲身。陰林石溜雲傳語。霜月溪梁水寫真。歲儉魚鮭難猝致。天寒烏鳥自相親。燎爐薪暖糟牀響。隨分歡留作好春。

以家事付諸兒惟不得姑蘇陸氏女子消息

祇憐地僻少過從。更許年衰養惰慵。行健有時尋近局。起遲嘗日到高春。鹿皮冠野頻頻戴。鵝頂蔬麤款

款供兒女團圓俱在眼。獨憐無信過吳松。

江海

江海三秋古鄧城。山林百拙剡溪生。歸來鄉國方爲客。絕盡交遊更畏名。白帽管寧形態醜。黃金季布語言輕。荒齋竟日無人事。自作長歌寄好聲。

兵後復還白巖山所舍作

脫命歸來意恍然。餘生堪喜亦堪憐。財逢亂世真如土。人到窮途始信天。問訊比鄰晡爨後。呻吟兒女夜燈前。明朝又作安西計。飯後誰家沁雪田。

鄞塘田家

經秋心事轉衰頽。客舍山村病眼開。識路牛羊緣坂過。通家燕雀下簷來。飢從野榼分蔬飯。渴指鄰帘貰黍醅。世事百年誰較是。髯公鼻息畫如雷。

江村遇九日

去年九月江城角。尙得臨風把一盃。今歲併無黃菊看。誰家更遣白衣來。身猶是雁飛難泊。時不如潮去解回。還有南山會人意。晚舟相對碧崔嵬。

再寄曹居士

江海悠悠不爲名。年深識盡世間情。於人有信惟潮候。去處無嗔是鵲聲。新欲收書添累重。舊曾學劍向

財輕。如何此日投閒迹。又結精廬傍古城。

兵後見三江口木芙蓉盛開

江上積花無數生。紅紅白白照江明。當年茂苑看曾厭。今日荒村望急驚。泣雨羈臣愁去闕。歌風豔女惜傾城。蕭條欲別那拌得。移向東籬配菊英。

遊西峯余兒時讀書其旁

山迴水抱西峯寺。二十年前日日來。一出居然負丘壑。深藏還此遠風埃。農樵識面逢多問。鳥魚知心見不猜。家世剡人須住剡。相尋未識百千回。

鮪鯿唐鄉貢丈置酒悟空寺見款

南宮通籍唐先輩。白髮天寒海上洲。五鼎已推華屋夢。一尊猶及少年遊。桃源有吏今安避。銅雀何人死亦休。祇羨龍鍾老禪伯。倚欄無語看沙鷗。

調貴白

客裏光陰取次休。嫩寒一夜襲衣裘。不須多畏趙盾日。正好深悲宋玉秋。紅葉舊題猶在手。黃粱新夢又從頭。餘糧栖畝猶圍坐。此事輸君第幾籌。

白巖山

漠漠溪風吹路塵。白巖山下幾窮身。秋深竹色老於樹。晝靜鳥羣喧勝人。何處人家藏剡錄。有時行客裹

唐巾平生笑殺朱翁子。剛爲乘車棄負薪。

絕句五言

班婕妤題扇圖

時情任銷歇。閨思轉慙懃。也勝山陰媼。揮毫託右軍。

子昂秋林行客圖

石棱棱而白出。樹悄悄以紅披。嗟紅衣之嘉客。方策蹇以何之。

五雜組

五雜組。金花綾。往復來。官路程。不獲已。始歸耕。
五雜組。斑斕衣。往復來。反哺兒。不獲已。爲人師。

絕句七言

張騫乘槎圖

數尺枯槎底易騎。海風吹浪白瀾瀾。如今市上君平少。曾到天河也不知。

呂氏六桂堂

年少奔馳有底忙。棘闈蘭署夢茫茫。白頭鞍馬風沙裏。聽說燕山六桂堂。

周秀才惠貓

狸兒輕捷豹兒班。作勢擒生也不難。漸覺形神欲相賀。青奴黃嬭夜平安。

汪濟秀才飯牛稿

冰雪玲瓏汪太中。吟詩十葉有家風。天寒日暮江東道。逢此顰伸牛口翁。

蘇李圖

塞北中郎雪滿頭。隴西壯士淚沾裘。人生百歲能多少。直至如今說未休。

元廟二道士俱以酒死

張髯好客月千壺。余吃清貧逐斗沽。二子若逢仙讌會。化成一對酒葫蘆。

湖州

山從天目成羣出。水傍太湖分港流。行遍江南清麗地。人生只合住湖州。

其二

一飽懸天不待求。幾人乾白少年頭。君看滾滾東流水。到海成淵始懶流。

百鷺圖題陳汝朝

葦折荷枯可奈何。西風吹影淨婆娑。微君作此超搖趣。一箇江天也厭多。

因營張村蠻窩并書所見

老子來無一把茅。居然得此好窪坳。開塘謹避蛟龍窟。伐樹須存烏鵲巢。

其二

頭白西來不買田。時時卻費買山錢。一丘一壑吾歸矣。守得田多是幾年。

其三

男兒三十氣吞牛。漏盡鐘鳴走未休。不問征西并處士。山中一樣土饅頭。

百雁圖

近看分明遠欲無。水天空闊好江湖。幸然不入虞人眼。又被閒中畫作圖。

題番陽徐氏雙頭牡丹圖

天公幻化不經意。雙萼忽然枝葉同。一似人間好兄弟。朱鞍錦轡踏春風。

陳公哲梅花百詠

梅下故人呼不應。石橋溪寺水泠泠。回頭聽得陳驚坐。一似春風吹夢醒。

其二

雪後西湖空碧波。酒徒消散也無多。白頭醒眼春風裏。奈此梅花百詠何。

張道士求橙林詩

地移淮橘多成枳。人說江梅竟是枳。蜀木似檉成底用。盛時名字落江南。

酬陳秀才

一春一百二十日。日日開眉得幾人。直與破除風雨去。今年渾似不添春。

賦董氏雙岐竹

山莊一對青青玉。瀟灑天然同榦生。說與人間好兄弟。時來林下聽風聲。

讀書有感

魯女悲嗟起夜深。當年枉卻淚沾襟。如今已免鄰人笑。老大知無欲嫁心。

其二

最愛徐生欲避秦。海天東去不通津。絕知勝似桃源境。男女同行五百人。

題子昂照夜白

風前新解錦鞍韉。雪色模糊霧色寒。此物人間無處着。千金祇得畫圖看。

題蘇李泣別圖二首

弓疲矢盡三千里。節弊衣穿十九年。流落天涯有離別。當時誰擬畫圖傳。

其二

沙雲如雪雪如塵。握手相看語語真。多少世間無淚面。一生錯笑隴西人。

馬浩秀才攜秋日海棠詩見過

山城八月有春風。一樹嫣紅淡又濃。縱使失時無態度。也勝茉莉與芙蓉。

奉化城西三溪口

青林白石三溪口。斑筍黃梅四月頭。正好清遊誰懶得。幸無公事且歸休。

題趙子昂疊岫圖

百折雲顛路儘通。無名怪木淡書空。相逢無問秋江客。不是巴中是剡中。

其二

白石青林底處無。侵雲亦有小屠蘇。桔花飛盡不歸去。揮汗江城看畫圖。

九月西城無澗同陳道士衡上人

仙翁面帶江海色。釋子口融冰雪漿。同是西風未歸客。燒香煮茗作重陽。

其二

巾衣三客不須同。泉石相看我亦翁。最惜一軒秋爛漫。芙蓉池上木犀風。

西興馬上

去時風雨客匆匆。歸路霜晴水樹紅。一抹淡山天上下。馬蹄新出浪花中。

贈屋西小陳秀才名公凱余字以無過

年少飢寒不足憂。笑談有味自風流。等閒輒贈兩兔穎。待看修成五鳳樓。

其二

毛錐自是今無用。鐵硯還知古可穿。不惜日鈔三萬字。勝儲百畝剡中田。

胡蝶

春山處處客思家。淡日村煙酒旆斜。胡蝶不知人事別。繞牆閒弄紫藤花。

夢中作

晴霞冠領朝紅潔。新漲連空晚綠酣。惆悵春風倦游夢。木蘭亭上望淮南。

入杭

曾江白酒樊江飯。處處當年客似家。垂老重來舊相識。春風只有野桃花。

題東玉師府所藏瀟湘圖

少年魂夢底曾閒。多在江湖煙水間。今日精藍方丈地。倚窗眠看洞庭山。

灼艾戲呈阮使君

鬢毛秋後轉漂零。愁坐窮簷展炙經。得似畫堂歌吹裏。硫黃鐘乳按娉婷。

水墨梅花

江海歸來見似人。離披猶自少風塵。何如淡月山莊夜。百幅清溪亂寫真。

贈陸相師

江南江北路漫漫。七十九翁能往還。今代貴人容易識。臥龍不在草廬間。

題伏生授書圖

白頭不死見時清。子女相依解授經。何用生男作鼃錯。乃翁一語不曾聽。

題江干初雪圖

斷樹寒雲古岸隈。漁翁初撥小船開。看渠風雪忙如許。還有魚兒上釣來。

銅山寺口初見梅花書寄何則顏二首

吳歌楚舞送年華。憶着終還不似家。今日春風吹夢醒。銅山寺口見梅花。

其二

沙疎石瘳水涓涓。折得梅花費兩年。更與何人說瀟灑。香中行坐水中眠。

戊戌清明杭邸坐雪

思鄉處處只愁生。正好春遊又不晴。雪是梨花雲是柳。馬婆巷口過清明。

四明山中十絕

雁飛不斷楚天長。雲路霜林級級黃。何處人煙有墟落。北風高壠散牛羊。
山深不見焙茶人。霜日清妍樹樹春。最有風情是巖水。味甘如乳色如銀。

右楓樹坑

右茶焙

小橫欲盡大橫來。萬壑千巖洶湧開。聞道洞天深幾許。紫雲深處有樓臺。
亂雲穿盡得平蕪。一段冰寒碧玉壺。猶是春風未相棄。山前吹長萬龍鬚。
洞深煙樹碧氤氲。只采靈苗不采薪。聞着蹤由多懶說。相逢莫有姓韓人。
怪石驚湍吼不休。時時巖客飲寒牛。誰知此水明州去。浸作琉璃萬頃秋。
七里黃泥紅樹岡。西風果熟一村香。居人只道山深好。三百年來是戰場。
仙在人間不易尋。當時已道是山深。可憐華表標題處。夜夜猿啼楓樹林。
兩頰棱棱額下分。更無坳處可藏雲。西風怕奪行人眼。蕎麥滿山鋪錦雲。
劉郎一去杳無蹤。水白山青只故宮。欲問巖前老松樹。人間禁得幾秋風。

右大小橫山
右北溪
右韓采巖
右莽廣溪
右木蘭
右仙山
右羊額嶺
右白水

題趙大年蘆雁

寒更索索警霜叢。兄弟當年意自同。猶是江湖太平處。未妨沈着臥秋風。

謝鄰友陳仲學秀才惠王芎苗二首

坊州杜若自堪羞。沛國青粘亦懶求。那似一叢蒼鳳尾。等閒收味古甌。

其二

君家自有頭風藥。種在青青竹素園。此物但堪供暑啜。肯來相就發清言。

瑞上人求詩

寶葉山中源悟師。布衲百結面如癡。十年相憶忽在眼。談笑甚似仍耽詩。
其二

源公作詩可憐生。亦有謾謾山林聲。見說丰姿委縑素。霜頰黛頂照人明。

茅齋

紅杏園林雨過花。遠陂深草亂鳴蛙。春風不問茅齋小。自向階前長筍芽。

感舊歌者

牡丹紅豆豔春天。檀板朱絲錦色箋。頭白江南一尊酒。無人知是李龜年。

蕭照春江煙雨圖

波痕如樹樹如煙。更是春陰小雨天。何處得魚何處醉。筍皮蓬底解蓑眠。

西塞山圖

空中生業寄魚蓑。雲是親情水是家。便有蹤由無處覓。春風岸岸野桃花。

李元中秀才歲晚游諸公間

愁中待醉何曾醉。夢裏還家不是家。輸與山行窮學究。一筇一笠看梅花。

丙午清明日青塘道中

三里五里沙路平。一番兩番溪雨聲。無奈春風動人處。紫荊青李滿林生。

桃花寺石臺

臺前藤蘚碧交加。臺下清流直又斜。待得丹成知幾日。春風隨分野桃花。
有人示山水畫卷以爲元暉作求詩

硯山山下小於菟。文彩爛斑今亦無。一塢亂雲濃似漆。春風吹夢過西湖。

題孟浩然霜曉吟行圖

霜風颯颯攪吟鞍。童怖驢愁作許難。便使玉堂遭遇去。朝參更是五更寒。

荀陳聚星圖

州里相過未厭頻。居然蹤跡動星辰。當時多少輝煌者。不畫諸公畫此人。

梁楷畫雪塞游騎圖

聳脰攢蹄一駐鞍。氍毹衣韋帽白漫漫。祇應田舍騎牛者。無此風沙踏雪寒。

過姑蘇

水天彌望接青蕪。雲氣漫漫近又無。一色好風三百里。挂帆安坐過姑蘇。

五雲山圖子昂爲戚氏作

林廬深插紫孱顏。一點漁舟帶暝還。但得身閒無俯仰。人間處處五雲山。

雨中過泉教張子開名先遇

平生剡夢十八九。短策還經靜者居。一曲好溪山起處。數聲疎雨雪來初。
其二

衣冠顛倒君休怪。筋力過從我有餘。卻笑秋風洛陽掾。得歸猶望食鱸魚。
次韻答鄰友近况六首

十百琅玕接屋山。麥花淡白菜花斑。有園富貴誰消得。更看溪南墨牡丹。

其二

炊成日影三竿直。睡起溪流一尺高。懵懂不知何歲月。山風吹白鏡中毛。

其三

祝雞歸後放牛初。小立溪梁看打魚。漸喜村鄰盡相識。向來朋舊卻無書。

其四

剡源田舍誰能識。只此桃源有路通。草長岸漫漁塹北。月明人語紙槽東。

其五

三間瓦屋數弓園。旋學桑麻又一年。村酒沾唇頻得醉。山歌出口卽成篇。

其六

舍南舍北種田郎。唱得田歌曲曲長。莫學榜村遊俠輩。茜紅抹額臂擎蒼。

送陳養晦謁閬風舒先生四首

嚼雪餐冰二十年。空山日月自風煙。從君識盡搜詩法。不透鄉巖不是仙。鄉巖山名。

其二

大篇無法須自悟。小語有益最難尋。祇今人嫌此老謔。後來追憶直千金。

其三

大冠襜袂走紛紛。對面可容三斗塵。便令眼識天下士。此子已勝尋常人。

其四

無詩莫入閬風里。到卻閬風那有詩。拾取松風作新曲。歸來時向夢中吹。

同曹泰宇賦寶化鳳花二首曹名說字習之

花開難得年年看。住近須還日日來。古壁危闌自顏色。不煩高築鳳凰臺。
鳳凰不出幾何年。莫怪山花惜杜鵑。一樣春風好毛羽。回頭曾管蜀山川。鳳以杜鵑化爲之。

過鄮山祠塾作

滄江城闕三叉口。白日弦歌數畝宮。猶有祠宮舊楊柳。向人離立管春風。

跋

戴帥初刻源集三十卷。一刻於洪武初。宋景濂爲司業時。再編於嘉靖中。周儀羽可。重刻於萬曆間。後裔戴洵。今世所行者皆此本。而頗不易觀。余購之久矣。嘉慶辛未冬。訪老友鮑君。以文於烏戍。時君病足。不能起。留坐榻前。情話竟日。並許以此書見貽。老人善忘。是冬未能卽寄。明年春。余有關中之役。及乙亥返里。已嬰末疾。欲達烏戍。未果。而君且歸道山。余自茗霽還。迂道烏戍。命兒子戔。代奠生芻。值令嗣志祖。它出晤於吳門。因及此書。今年四月。又見志祖於吳興。復申前說。旣別。輾轉覓寄。八月始達常州。知爲竹垞秋岳藏本。鮑君亦嘗校之。書誠不易觀。而購之者亦綦勞矣。爰識得書所從來。並及鮑氏兩世交誼。至於帥初之文。自爲宋文憲推服。洎乎國朝。已入四庫。久經論定。不更贅云。嘉慶丁丑九月。收庵叟趙懷玉力疾書。

余既得袁清容居士集元槧本五十卷。刊之。清容爲戴剡源先生弟子。剡源集。無論明初所刻。卽嘉靖間周儀菟輯者。亦殘佚不易得。余家所藏。卽黃梨洲先生所從選錄。不全本。蓋是集幾湮失久矣。今所刊三十卷者。寶山毛君生翁得於武進李申耆太史。太史得於同郡趙味辛司馬。司馬則得於湖州鮑以文孝廉。司馬跋云。是書爲竹垞秋岳兩先生藏本。鮑君亦嘗校之。今觀書中回易刪加。朱墨爛然。皆無主名。不能分別某者爲何氏。其明確者。旣胥從之。而意有未安。亦弗敢徇。至原本字畫音義。顯繆脫者。輒以己意參攷補正。疑者闕之。其朱墨校改者。旣不能辨爲何氏。則統以或云括之。而余所更定者。則率隨文條列。又原本詩文間有空字。或仍或否。亦率注明。以存原刻體制。凡三閱月。是書始少完具。可繕寫付剡。夫剡源先生之文章。淳博奇雅。義法整贍。宋末元初。爲東南一大家。宋金華諸賢多論著之矣。而惟是實事求是之心。不敢攘善。不敢臆決。區區矜慎所由刊刻者。略述其大端。以告後世。且使海內博物君子得匡其疏漏云。道光二十年五月三日。上海郁松年泰峰氏書於宜稼堂。

重刻剡源集札記

上海郁松年泰峰氏撰

原本每葉二十四行，每行二十三字。

目錄

剡源先生自序在元史本傳下，原本編次，列於諸家序末，在目錄前，今改正。

第七卷左氏窺斑序，斑原本誤班，今改。于景龍注朱氏小學書序，于原本作干，案後題及文並作于，朱

原本作宋，後題作朱，今並改。程宗旦古詩編序，古原本脫，今據後題補。

第十五卷曾君墓誌銘，曾原本誤曹，今據後題改。

第十八卷題徐可與詩，與原本誤興。題寶葉真真誤貝，題獎孝詩卷後，獎誤蔣。題坡書歐陽公鵝鵲

圖，鵝誤鴨，今並據後題改。

自第十八卷題盧鴻草堂圖，至第十九卷題趙子昂摹龍眠飛騎習射圖，原本闕一葉，今據後題補。

第二十一卷觀漁賦，漁原本誤魚，今據後題改。

第二十三卷讀蔡氏獨斷，讀原本誤續。辨孔壁傳，壁誤璧，今據後題改。衆祭徐子方承旨文，承誤丞。

後題同，後題或改承，今據以改。祭張村干廚奧山神文，奧原本作畧，案字書無畧字，奧與奧、隩通，清

容集及集中多从奧。其从舉者今並改。

第二十五卷。孟之反不伐一章下文。有子曰富與貴一章。目錄誤在中庸。其至矣乎下。今改正。故至誠

無息三節。謙尊而光二句。原本並誤一章。祭如在一節。節誤章。今並據後題及文改。

第二十六卷。良冶之子至馬前。滄浪之水清兮二節。惻隱之心八句。原本並誤作一章。今改。

第二十七卷。五言古詩九十八首。原本誤作四十五首。中有賀阮侯伯子題。標明排律十七韻。餘俱古體。

原本作排律十六首。舛誤殊甚。今並改。

第二十八卷。六十五首。五原本誤四。今改。

第二十九卷。一百首。原本誤作九十九首。今改。

第三十卷。律詩七言。原本誤首。今改。

卷第一

仁壽殿記。常棣伐木之燕樂。常原本誤棠。今改。洪惟皇元。原本惟下空十四字。今不空。

和靖書院記。艱關載而南。原本關下空一字。今仍空。

美化書院記。翼廟廡。廡原本誤廉。或改廡。今從之。

稼軒書院興造記。遂始竟堂寢齋廡門臺。廡原本誤廉。問地廣袤若何。袤誤袤。財計贏縮若何。贏誤

贏。今並改。

銀峰義塾記。競競然惟恐墜思齋基構。是懼競競。或改兢兢。非。說見清容集札記。今從原本。未遠於耳目間乎。遠原本誤達。或改遠。今從之。

當塗戶曹掾續題名記。待己尊而期澤物也。急原本待下誤空一字。今不空。

三江鹽場興造記。父老擁垚而交賀。案字書無垚字。說文赤部垚。則古文赤字。或疑古文地字。垚之誤文。攷說文土部圣。云汝潁之間。謂致力於地。曰圣。讀若兔窟垚。云土塊垚垚也。圣與垚字尤形近。然擁赤擁地。擁圣皆不詞。當是垚字之譌。無他本可校。姑仍之。以人人計者。二人字疑有衍譌。

喬木亭記。鳴鐘鼙鼓。鼓原本脫。或補。今從之。

紫芝亭記。潤爲榮河。榮原本作榮。案梁簡文帝大法頌。榮河恥其祥潤。又徐陵文。堯舜之臣。榮河鏤其金版。與上祥風爲對文。當作榮。若榮則澤名耳。於義不協。今改。

卷第二

質野堂記。客聞而愈笑。聞原本誤問。今改。

水心雲意樓記。而何以有取於水與雲乎。何原本誤可。或改何。今從之。清人之突未黔。突原本作突。攷說文宀部突。深也。一曰竈突。从宀从火。从求省。案突爲淡淡之淡正字。又爲竈突字也。突爲犬從穴中暫出。非義。此如暝雲歸山。暝誤冥。今並改。

養心齋記。教子以佚老。佚老原本誤供者。或改佚老。今之東湖。東誤束。或改東。今並從之。

學古齋記。揚子雲。揚原本誤楊。余問仲實。問誤聞。今並改。

愛日齋記。吾甚愛揚雄氏之言愛日也。揚原本誤楊。越之姻連多良儒。連作嬣。案。字書無此字。今並改。

卷第三

容膝軒記。則當席地而坐。當原本誤常。或改當。今從之。

餘軒記。憤焉與凡民何異。憤原本誤貴。或改憤。今從之。

省軒記。雖陰暝。暝原本誤。浮揚子。揚誤楊。今並改。齋戒也。省於肸。肸誤盼。或改肸。今從之。

清茂軒記。蹤跡宜可考見。跡原本誤踪。今改。

松風閣記。萬物枯槁。鳥棲獸藏。槁原本誤稿。鳥誤烏。今並改。飯蔬飲水。飯誤飲。或改飯。今從之。

拂雲閣記。澄觀反視。反原本誤及。或改反。種種皆不可得。皆誤何。或改皆。廬西峰下。原本作慮。清清

西廬峰下。或刪改。當有所據。今並從之。

芷屋記。嘗以芷屋名其居。芷原本誤芝。或改芷。今從之。如江籬。杜衡。籬誤籬。今改。

擬晉山房記。一旦猝然起之。猝原本誤倅。或改猝。今從之。

卷第四

陶莊記。因而疏。翎流之波。以爲池。案。字書無翎字。疑作翎。

冰谷記。爲霜爲雪爲雹。雹原本誤電。或改雹。聞里之簍人。之誤人。或改之。今並從之。

文溪記。喜則藉溪石而謠。藉原本誤籍。今改。

西村記。而况循循然者乎。况原本誤元。或改况。今從之。

中枝山葬記。緣之而起。起原本誤人。或改起。今從之。

丹泉墓記。姑取荒遠一微僚。僚原本誤潦。或改僚。今從之。

唐畫西域圖記。或識題下云。此篇缺後半段。雖黎洲先生選刻亦未見也。頃從鮑從善鈔本校補。惜世無

知之者。嘉慶壬申五月二十六日補寫。改正六字。刪二字。介叟。時年八十又五。今案。每國畫一王。而一

二奴前後挾持之。畫原本作書。前原本作於。解衽原本作微解。一奴皮韜髮。皮原本作布。故若是泯泯

不著。泯泯原本作淺淺。實改七字。云六者。蓋不數重字也。原本篇末。誠可比於不雕之朴矣乎。矣乎二

字。刪下補未散之質。至與之共焉。二百七十三字。並從之。餘器藻鏤精潤。鏤誤鏤。魚肉蕞。蕞誤

籟。今並改。

寶陀山所見記。駭眩驚怛。眩原本作駭。案玉篇。馬一歲曰駭。與文義不合。當是眩之誤文。今改。故至誠

如神。豈非然耶。然原本誤能。或改然。今從之。

損庵記。几吾子之所自名。子字疑衍。

順寧庵記。劉伯倫之荷鍤。倫原本誤伶。或改倫。案劉伶字伯倫。今從之。

西原庵記。六年。次昌國。普慈。八年。撤普慈一新之。普原本並誤晉。或改普。此世之達人之誤。世或改之。

今並從之。

卷第五

會稽唐氏墓記。至擇葬地。地原本誤也。今改。

小方門戴氏居葬記。次子萬三三府君諱杳。案字書木部。山部並無杳字。

計籌山昇元報德觀記。有壇尋丈。丈原本誤文。它日余持此說也。它誤宅。今並改。

程母二夫人祠堂記。緣飾覆護。飾原本誤飭。或改飾。今從之。

固海宿雲山崇勝寺記。前此構寺者。此原本誤於。或改此。今從之。 簞笠扉履之所不及。扉誤扉。案說文。

扉。戶扇也。扉。履屬。釋名。草履曰扉。扉與扉義別。今改。

天壽報本寺記。則風煙林莽間。煙原本誤湮。今改。

卷第六

杭州祐聖觀記。藉有司之力。藉原本誤籍。今改。

重建瑞龍威德寺記。以爲昔馬祖禪師。昔原本誤時。今改。 大臨崇弼等案。字書無弼字。當是弼字誤文。

此樂堂記。適無牴牾。牾原本誤抵。或改牴。 令樂天在。令誤今。或改令。並從之。

冰雪相看之居記。吳成季法師之居。季原本誤李。今改。

晚香堂記。華編巍榜。巍原本誤魏。或改巍。今從之。

先天觀記。原本益南。又橋下空二字。過門益北。下空五字。曰深處下空二字。今仍空。櫛而鉤腹者。案器物之狹而長者曰櫛。原本誤櫛。今改。

卷第七

通鑑寤辯序。時其羸拙。而不時其羸拙。羸原本並誤羸。或改羸。今從之。

讀易蠡測序。余攷王制。攷原本誤殘。或改攷。一目卽了。目誤日。或改目。今並從之。原本徐君涉世益

下一字漫滅。今空。

左氏窺斑序。斑原本誤班。或改斑。君已脫稿久矣。稿誤稿。或改稿。今並從之。

于景龍注朱氏小學書序。如揚雄問方言。揚原本誤楊。凡揚雄揚子雲卷內同。今並改。于君景龍。龍誤

音。案目錄及題並作龍。今改。

急就篇注釋補遺自序。若黃帝之醫藥。黃原本誤皇。或改黃。中道輟書。輟誤輒。或改輟。今並從之。

左氏蒙求序。伯秀崑然占居上游。崑原本誤菟。或改崑。今從之。

奇童烈女寶鑑序。而聒其視聽。聒原本誤聒。今改。

雙溪王先生尙書小傳序。原本作尙書小傳序。雙溪王先生。序下空一字。案與諸題不一例。今改。

天原發微序。絕地天通。天通原本誤通天。或改天通。案本尙書呂刑。今從之。

王伯善農書序。歲時屬耆老強壯。老原本誤者。或改老。今從之。

齊東野語序。雖孟子亦嘗爲齊學者也。嘗原本誤當。或改常。非是。今改嘗。

卷第八

大學中庸孝經諸書集解音釋序。使尋源者不迷其津。津原本誤精。今改。

桐江詩集序。而自有不容不似者。自原本誤目。或改自。今從之。

趙君理遺文序。余時以爲景高好諛言。諛原本誤庾。今改。

陳無逸詩序。中經憂患。經原本誤經。或改經。今從之。

張君信詩序。惟於攻詩最久。於原本誤我。或改於。今從之。

張仲實詩序。實原本作寔。案前張仲實文編序及目錄並作實。作寔誤。篇內同。今並改。譁爲訟謀。譁原

本誤謹。或改譁。今從之。

陳季淵詩序。與遺完裕之同輩。遺完盛推下之。遺完疑並作遺山。或遺完裕之作遺山。元裕之。山元二字誤合爲完。下遺完則遺山也。無他本可校。仍之。

卷第九

董叔輝詩序。倍華之木。木原本誤末。或改木。叔輝之詩。詩誤世。或改詩。今並從之。

國南仲詩後序。又經鄉先生二公爐鞴。鞴原本誤鑪。案玉篇。鞴。火拜切。韋囊也。可以吹火令熾。亦作囊。今改。

長江和漁歌序。昔元次山有浯溪詩。浯原本誤洁。或改浯。今從之。
吳僧密古師詩序。蓋天挾其疾。挾原本誤快。或改挾。今從之。

圓至師詩文集序。圓至師在天童育王時。王原本誤士。或改王。今從之。

魁師詩序。皇然摩鑄。洒削雕鍛。摩鑄洒削雕鍛之喧煩而爲美也。鑄原本並作鑄。案字書金部無鑄字。攷玉篇。鑄力預。力魚二切。錯也。集韻。鑄錯銅鐵也。本作鋁。與鑄通。攷說文。金部。鑄錯銅鐵也。玉篇。鑄錯也。鋁同上。考工記。秦無廬。注。廬或曰摩鑄之器。疏。柄須摩鑄使滑。是摩鑄連文。今改。

珣上人刪詩序。則不如無言。如無原本誤無。如今改。

余景游樂府編序。同鄉友余君景游。余原本誤朱。案題及目錄並作余。陰在敦牂。牂誤祥。今並改。

卷第十

李氏族譜後序。不可復考。原本考下誤衍一考字。或刪去。今從之。

襄中雜詠圖詩序。廉不勳物。廉原本誤廣。或改廉。今從之。

旌表節婦徐夫人詩序。謹顯誦所聞。聞原本誤聞。今改。

八月十六日張園玩月詩序。而調娛其血氣。調原本誤凋。或改調。嘯歌起止。止誤上。或改止。今並從之。

游雲門若耶溪詩序。原本於是暮春湍林下空二字。今仍空。

游南巖詩序。則榮之子義榮。番陽湯及翁及翁案。義榮以父之字爲名。及翁名字不異。疑並有誤。

陵陽牟氏壽席詩序。宜不能視昔之儉。視原本誤親。或改視。今從之。

城東倡和小序。卽相與循關垆。關原本誤開。案篇韻皆無開字。門部與十耕闕。並云門扉聲。於義不合。而玉篇闕爲關俗字。當是原文作關。从俗作闕。涉闕而誤爲開也。又關垆郊。關垆野也。今改正。伯玉旣和。玉原本誤王。或改玉。今從之。而張仲實陳無逸諸賢。又皆有和。和詩遂不可勝紀。有和原本作和有。或以又皆和有。和詩爲句。非是。今改。

游蘭亭詩序。羊公悲峴山。峴原本誤覘。或改峴。今從之。

客樓冬夜會合詩序。原本樓下誤空一字。今不空。

卷第十一

紫陽方便君文集序。屈、賈、司馬、班、揚、韓、柳、歐、蘇之於文。揚原本作楊。案班揚數揚子雲也。今改。千峰酬倡序。故友謝皋羽。惜皋羽不在。皋羽原本並誤羽皋。或改皋羽。今從之。

陸孟孫字士宗序。遂名天下。遂原本誤逐。或改遂。今從之。沃土不材。沃原本作息。案序本據魯語。攷國語作沃。原本誤。今改。

曹仲達字序。蓋有關垆揚軌。關原本誤闔。案字書無闔字。篇韻關。窺也。窺垆義近。字形亦相似。今改。袁氏子字說序。袁原本誤李。或改袁。今從之。

王仲昭字說序。從容廟廊。容原本誤客。或改容。無桁楊桎械之辜。桁誤術。或改桁。今並從之。楊誤揚。今

改

卷第十二

趙氏二子字序。故以成季之志。季原本誤李。或改季。今從之。

唐氏十子字序。命之皆名居。名原本誤居。或改名。今從之。

朱使君七子字序。曰明曰寬。寬原本誤覺。或改寬。今從之。

道上人字逢源序。目不能使越仁義而視。目原本誤自。或改目。今從之。

陸原章字序。曰璋玉。玉原本誤王。或改玉。今從之。曰樟木。其在人。木其誤其木。今改。余因家子少年

子名原章。因疑作姻。原誤元。今改。

卷第十三

送白廷玉赴常州教授序。毗陵爲南中文獻之國。南原本作浙。固誤。似當作吳。或改南。必有所據。而有

不盡於鄉黨故舊。蓋原本誤書。或改盡。今並從之。

送盛元仁赴吉水教授序。必足以檢括應接。括原本誤捉。或改括。姻黨載餞於郊。姻誤姻。或改姻。今並

從之。

送杜孟傳之石門洞序。若君家先大夫發明之。夫原本誤父。或改夫。今從之。

送高虎臣序。原本裒編載下空一字。今仍空。

送唐君儒序。橋李唐君君儒。橋原本誤携。或改橋。今從之。

送陳養晦遠遊序。揚雄汙穢而不慙。揚原本誤楊。今改。原本不惟厲吾下空一字。今仍空。汧隴之北。

隴誤瀧。或改隴。平生名高交友。名誤有。或改名。今並從之。

送鄭聖與遊闕里序。東南慷慨士大夫。慨原本誤愷。今改。

葉茂叔之淮安序。余嘗宦學經從。宦原本誤官。或改宦。今從之。

卷第十四

送貢仲章序。貢名仲章。章原本誤璋。或改章。今從之。

送曹士因序。其人英爽峭邁。人原本誤亦。或改人。今從之。

送吳州判還番陽詩序。如大庭之治。小俎庭疑作庖。

送趙學古歸永嘉序。一日脩羸滕。羸滕原本誤羸勝。或改羸滕。今改之。

送老甘秀才序。鄙棄科目。目原本誤自。或改目。今從之。

送宋吾省序。此猶先王之遺澤也。王原本誤生。或改王。今從之。

贈曹子貞編修序。則又材高者既不吾屑。原本又下有可字。或刪去。材作相。或改材。今並從之。敝韞羸

儻。儻誤縑。今改。

送龔子敬序。乃方從於大夫車馬後。車原本空。或補。今從之。

贈相士歐陽生序。而術常不敗。常原本誤嘗。今改。

送李公度歸三茅序。佯狂出門而逃。趙君非佯狂迷惑者。佯原本並誤佯。案。佯。玉篇。彷徨也。廣韻。徬佯。徙倚也。廣雅。徜徉。戲蕩也。佯。詐也。淮南子。兵略訓。此善爲詐佯者也。又通作陽。六書故亦借用。詳史記。凡佯字多作陽。詳宋世家。箕子被髮佯狂。正作佯。今改。

送郭以南爲道士北遊序。言行誕譎。誕原本誤談。或改誕。今從之。

送慶上人謁陳使君序。陳公又天下之端直傳毅君子也。傳疑作專。

送恩上人歸雲門序。可以遣吾老。遣原本誤遺。或改遣。平生交友滿江海。原本生下誤衍高字。或刪去。今並從之。

送子儀上人北遊序。顧爲瀑布則有事瀑布。原本有下衍瀑布二字。或刪去。今從之。

朱尉開伯求葬親費序。今其車蓋過子之門者。車原本誤居。或改車。今從之。

送鉛山王亦詵歸鄉序。揚子江漁人。揚原本誤楊。今改。烏鳶蛇蚓之同也。烏原本誤鳥。或改烏。今從之。

送柳道傳赴江山序。銓格密。銓原本誤詮。今改。

送鄭南仲赴昌化主簿序。而南仲亦不能釋然以間於余。間疑作問。亦非必以其官也。以其原本誤其。以。或改以其。今從之。

送謝仲潛序。每出經義策諸生。經原本空。或補。吾比鄰里巷知識類也。類誤頓。或改類。今並從之。

卷第十五

安陽胡氏考妣墓志銘。嘗典掌本郡財賦。財原本誤材。今改。夫忠於前。夫誤失。或改夫。今從之。
曾君墓志銘。居士既蚤夜勗君于家。于原本誤干。或改于。今從之。
吳君墓志銘。墾殖日增。墾原本誤懇。今改。以招延名師。招誤昭。或改招。今從之。
楊氏考妣墓志銘。入瞻槃杆之戒。杆原本誤杆。或改杆。今從之。孰得而羸其家。羸誤羸。今改。
游縣丞墓志銘。原本次故迪功郎新會尉下空二字。今仍空。生爲勞儒死羈客。星風瘴癘魂焉薄。羈誤羈。薄誤簿。今並改。

故玉林項君墓志銘。似造物者。似原本誤以。或改似。今從之。不越月。原本不下空一字。今不空。

卷第十六

單君範墓志銘。有微名。微原本誤徵。或改微。今從之。

陳府君功父墓志銘。原本一見奇待舉下空二字。今仍空。風谷之琅然。琅原本誤琅。案說文。玉部。琅。石之似王者。琅訓琅玕。似珠者。玉篇。訓與說文同。而楚詞九歌。璆鏘鳴兮琳琅。又周禮。夏官。司馬振鐸注。司馬法曰。鐸聲不過琅。是琅有聲。訓作琅。非。今改。

伯妣袁氏夫人遷葬志銘。幾無以容拜展。展原本誤展。案字書無展字。今改。
故道錄章公墓志銘。將窆洞霄山中。霄原本作霄。案說文。篇韻。皆無霄字。山名洞霄。不名洞霄。作霄誤。今

改。師諱氏。案氏當是民字誤文。代期未滿而退。未原本誤末。在園洞。洞誤同。案上兼住持園洞。觀作洞。今並改。

康濟甫墓志銘。原本密州之下空一字。今仍空。

張允甫墓志銘。被檄考校兩浙進士。檄原本誤傲。或改檄。今從之。獨力懃訣母。母誤毋。今改。李思宣墓志銘。皆有條貫。貫原本誤貫。今改。

卷第十七

徐使君墓表。華通直亦老。原本華下誤空一字。今不空。屢道賈平章意。章誤意。今改。原本庸敢竊附

二賢下空一字。今仍空。

五山陳公墓表。次適趙鎔。案字書無鎔字。疑作鎔。使後來爲者。爲下疑有脫文。徐耕道遷葬碣。惟與宗族鄉黨相倡和。與原本誤去。今改。

卷第十八

題繆氏族譜。併遺故老不可物色者。遺下似脫聞字。

題徐可與詩卷。卽秦丘壘廬舍。壘原本誤襲。或改壘。今從之。

題陸渭南遺文鈔後。若俗雅四六。六原本誤三。今改。

題蜀蘇氏族譜後。論揚雄之無後。夫揚雄之賢而文。揚原本並誤楊。今改。

題趙幾仲詩編後。皆其人手自料簡。料原本誤科。或改料。今從之。

題梅庵柴君自書所作詩後。與汪有連。連原本作嬋。案字書無嬋字。史記尉佗傳。及蒼梧秦王有連。注有連者。連姻也。正作連。今改。

題萬竹王君詩後。及退而輒相與歎其無成。歎原本誤歡。或改歎。今從之。

題京兆劉侯事後。故顏真卿張巡之徒之。不得死於牖下。徒原本誤待。或刪去待之二字。與下李陵孔光之惜身顧蔭爲對文。於義亦通。第紬繹本文。以如顏張者尙多。故用之。徒括之。如李孔者亦然。則省文矣。徒與待字形相似而誤。今改。李陵孔光之惜身顧蔭。李誤季。或改李。然猶時時桀驚。驚誤驚。或改驚。今並從之。

題婺源武口王氏世系。可知者爲唐尙書郎園陳。陳原本誤陳。案字書無陳字。此陳字誤文。今改。

卷第十九

題趙侍郎誥。固是趙氏家寶。寶原本誤實。或改寶。今從之。

題陳了翁合浦與弟帖。歸罪蔡卞。卞原本誤下。或改卞。今從之。

題陳強甫樂府輒略加鑷括以通之。括原本誤括。今改。

題趙子昂琴源律略後。雖余之愚。余原本誤舍。或改余。今從之。

題唐師善談乘羣子弟載筆札。羣原本誤郡。或改羣。舉閭巷牀第猥褻近事。第誤第。或改第。今並從之。

題徐山長講義。余猶及見浙閩諸老先生。浙原本誤折。或改浙。今從之。

卷第二十

跋宋元獻韓獻肅二公流盃小飲倡和詩帖。元獻原本誤元憲。案目錄作元獻。今改。

遜齋銘。芟槁鋤彊。槁原本誤縞。今改。

奉化州庠小學箴。揖遜折衝。衝原本誤衡。今改。

袁氏字箴。國袁氏子瓘。案瓘卽袁清容長子。國疑作越。或作鄞。或國上脫越字。

知奉化州于伯顏去思碑。儻僬僬外顧而無留心。僬或疑傷誤是也。案說文人部。僬小兒。國語曰。僬飯不及

一食。玉篇云。僬公黃公橫二切。國語云。僬飯不及壺飧。注云。僬大也。大飯謂盛饌。與許異義。攷廣韻十

一唐。僬盛兒。義同韋。十二庚。僬小兒。春秋國語曰。僬飯不及壺飧。則義同許。是僬有大小二義。公黃切

者。大也。公橫切者。小也。故廣韻兩收之。而許訓僬則爲小也。意許所見越語是一食。非壺飧。壺飧小飯

不及一食。大飯不及壺飧。其喻輕重等耳。故許以小爲義。則儻僬亦有本。仍之。三年科徭平。徭原本

誤搖。繫此樂石。石誤右。今並改。

卷第二十一

可竹軒賦。弛擔揮縷。擔原本誤檐。瑰質瑋狀。瑋誤瑋。竹當輾爾而笑。輾誤輾。今並改。

一大庵賦。原本豈不知夫郊之獲爲飽下空二字。今仍空。孰與古之黔婁萊蕪賢。萊蕪賢而生無炊。

萊並誤菜。或改萊。今從之。

喜友堂賦。揚襟振弁。揚原本誤楊。今改。

靜軒賦。於是教之以學默。默原本誤然。或改默。今從之。不得已於處。於誤而。今改。

容容齋賦。濯纓於清泠之流。泠原本誤冷。今改。

蠅虎賦。不爪距而囚。爪原本誤瓜。今改。

卷第二十二

讀吳起傳。齧母而訣。而齧母殺妻者乎。母原本並誤毋。今改。

伍子胥列傳。而伍奢傳其子建。傳原本誤傳。今改。

蘇秦傳。豈得以魯仲連。虞卿之事比之哉。虞原本誤虛。或改虞。今從之。

樗里子。甘茂。甘羅。魏冉。白起。王翦。列傳。採果於垂熟。採原本誤林。或改採。今從之。

孟子。荀卿列傳。猶賢於他氏。萬萬也。非若他氏。氏原本並誤事。案下屢云學他氏者。今改。與夫非謂

孔氏。夫誤末。或改夫。今從之。

伯夷。叔齊列傳。吾太史公表伯夷爲列傳首。吾下疑有脫字。

商鞅傳。屢與齊晉爭盟。晉原本作桓。案吳楚不獨與齊桓爭盟。且吳未嘗與齊桓爭。篇中屢舉齊桓晉文。

此不當獨云齊桓。作桓誤。今改。不六世而席卷先王之疆宇。疆誤疆。汲汲然富疆之術。疆誤疆。今

並改

卷第二十三

佩韋辨。時徒維攝提格案。徒爾雅作屠。屠徒古通。惟爾雅釋天。太歲在戊曰著雍。在己曰屠維。史記曆術甲子篇。徒維敦牂。索隱曰。徒維戊也。敦牂午也。祝犂協洽。索隱曰。祝犂己也。爾雅作著雍。凡八見。戊皆曰徒維。己皆曰祝犂。與爾雅正相反。而歲陰則天官書皆與爾雅合。又攷淮南子天文訓。午在戊曰著雍。高誘注在戊。言位在中央。萬物繁養四方。故曰著雍。未在己曰屠維。注在己。言萬物各成其性。故曰屠維。屠別維離也。是歲陽在戊。古皆曰著雍。在己皆曰屠維。明矣。而史記與索隱歲陽互易者。或是傳寫譌也。案此文後書云。己卯前。前者戊寅也。不曰著雍曰徒維。是從史記。

衆祭徐子方承旨文。承原本誤承。或改承。今從之。原本死而下空一字。今仍空。

祭張復山長文。不羸五秉之入。羸原本誤羸。今改。

祭趙丞文。原本弱罷市上空一字。今仍空。

代千奴監司歸祭祖考妣文。匪以飾哀。飾原本誤飭。今改。

遷奉祠堂文。昭告于戴氏初祖。原本于下空十字。今不空。

祭徐母吳氏夫人文。而能督飭孩稚。飭原本誤飾。今改。以使遠異乎凡珉。珉誤氓。或改珉。今從之。孟

螯遷鄰。螯誤螯。今改。

卷第二十四

標題書啓啓原本脫今據目錄補

趙氏婚啓開百世之祥百原本誤八今改

回弋陽趙教授啓以鳴伐木之求鳴原本誤鳴今改

回舒子燕送鵝酒啓政自安於儉陋儉原本誤險或改儉今從之

代太學同舍內優成謝賈平章啓恢一陶之埶北北原本誤北取仇覽長裾之美裾誤裾乘機併進

乘誤乘器躍冶而鐘鏞冶誤治今並改原本茲蓋恭遇下空一字今不空某敢不激昂弱質質

原本作鹽案字書無鹽字以文義求之當作質今改

石屏戴式之孫求刊詩板疏慷慨揮毫慨原本誤愷或改慨今從之

鈔題刊傷寒書機要疏百不將於二三將疑作得

萬戶府靳提控求仕疏辭柳烈君染衣烈原本誤列或改烈今從之

翁舜咨疏原本食三斗下空一字今仍空

案目錄二歌者傳上行題一傳字漁說上行題一說字蜜諭上行題一諭字原本並脫今補

卷第二十五

子曰富與貴是人之所欲也一章君子未嘗避焉君子未嘗辭焉未原本並誤末今改

子曰。德不孤。必有鄰。先王盛時。王原本誤玉。其機括在父兄師友。括誤栝。案栝。木名。括。矢末。機括字當作括。今並改。

謙。尊而光。卑而不可踰。如公孫圉之開東閣。閣原本作閣。案說文。閣。所以止扉者。玉篇。樓也。揚雄校書於天祿閣。又皮物之閣。又閣道。並从門。从各。閣說文。門旁戶。攷公孫圉傳注。師古曰。閣者小門。東向開之。避當庭門。而引賓客。以別掾史官屬。是東閣當从門。从合。作閣誤。今改。

菁菁者莪。四章。則散慢猥嫫。嫫原本誤牒。四章言汎汎楊舟。楊誤揚。今並改。子罕言利。與命。與仁。五尺童子類能言之。五尺原本誤三寸。今改。又從而躋之。躋疑作頤。

卷第二十六

大畜。象曰。天在山中。大畜。君子多識前言往行。中原本誤上。今改。

周禮。天官冢宰。以九兩條。惟有友以任之。任原本作信。案上講吏以治得民云。惟有吏以治之。下講藪以富得民云。惟有藪以富之。此講友以任得民。不當舍任而言信。作信誤。今改。

說命。惟學遜志。務時敏。厥脩仍來。允懷于茲。道積于厥躬。惟教學半。念終始典于學。厥德脩罔覺。案。教學半。教書本作斲。學記。引作學。此殆以意改。當傳說時。如傳說其人。傳原本並誤傳。今改。子曰。中庸其至矣乎。民鮮能久矣。禹之傳子。於理當傳子。禹不容不傳子。原本三子字皆誤賢。夫胡廣阿時取容。時誤恃。今並改。

良治之子至馬前。良工之子必學爲箕。何也。良原本誤爲性。本有此仁。仁誤物。今並改。
子曰伯夷叔齊一章。夫子乃以爲不念舊惡。子原本誤入。今改。

卷第二十七

大名元復初郎中攜示感遇五言八章。次韻并簡東平曹子貞編脩。薊丘曹克明教授。簡原本誤陳。或改東案。集中東某多作簡。此亦當作簡。今改。明有不見睫。原本連上爲一首。或以爲又一首。今從之。
韓君美經歷賦。孟夏木長五詩。示僕因寫鄙懷。通呈阮使君。木上疑脫草字。詩辛苦受羈束。羈原本誤羈。今改。

以羔裘如濡。洵直且侯。韻爲八詩。送夾谷子括赴明州推官。直原本作美。案詩鄭風羔裘文作直。又八詩僅存二首。直韻正存。作美誤。今改。侯誤侯。或改侯。今從之。

送袁季源之婺州。因簡范經歷。長髯善哦吟。哦原本誤喫。案字書無喫字。今改。

謝陳君祥憲使居突不得黔。突原本誤突。今改。

往時王達云云。余按淵明乞食詩云。飢來驅我去。驅原本誤驅。今改。詩不如魯公仁。公誤侯。或改公。今從之。

君莫誇少年。一首贈俞光遠。俞原本誤余。案二十八卷有俞光遠父子歸馬輿兼託問訊故舊詩。詩中有俞郎三世成清儒。並作俞。此作余。誤。詩新銳君當祛。祛誤祛。今並改。

余居之西偏有小室。名寄庵。詩以識之。衰年百事祛。祛原本誤祛。今改。收君詒癡符。佩我養生主。詒誤論。或改詒案。詒音靈。銜也。賣也。顏氏家訓。吾見世人。至于無才思。自謂清華。流布醜拙。亦以衆矣。江南號爲詒癡符。正作詒。今從之。佩誤佩案。佩廣韻音風。地名。今改。

朱使君家諸郎將別。十一韻。歲月翎箭疾。翎原本誤翎。或云翎。當作翎。箭羽也。今改。送官歸。作行吟。蒼松籟。蒼原本誤岑。或云岑。當作蒼。今改。

七陽字。原本違嚴風上空一字。今仍空。

六月十三日。壽陳子徽太博十首。以無官一身輕。有子萬事足爲韻。三。一字。麾驅非吾任。驅原本誤驅。今改。五。輕字。原本秋風生上空一字。今仍空。

陳茂陽書監赴史氏塾。飄落隨長風。長風原本誤風長。或云。隨風長。當作長隨風。案。第倒長風二字。義已明。今改。

卷第二十八

聽琴行贈沈秀才。湖園日煖百花笑。笑原本作嘆。案。當作咲。俗笑字。因誤爲嘆耳。今改。夜寒行。朔風蕭蕭吹戍旗。戍原本誤成。今改。

招子昂飲歌。人生何處少泥塗。少原本誤小。或改少。今從之。雁南飛。得飽且住。今亦樂。且原本誤目。或改且。今從之。

山茗行。縛作蓬鬆掃塵帚。鬆原本誤菰。今改。

賦意未暢。復拾前韻之餘者。作廣坐隱詞。原本暗室生天光。上字。今仍空。

范文正公黃素小楷。昌黎伯夷頌詩。昔離孔氏。或自歸。昔原本漫漶。或作昔。今從之。

送程敬叔教諭赴建平。飲冰茹蘖。善自愛。冰原本誤水。蘖誤藥。或改蘖。案當作藥。今並改。

題李伯時畫五馬圖。前驅麒麟。後鸞鳳。鳳原本誤鳳。案依韻當作凰。今改。

看花曲。馬蹄蹴碎牆西草。碎原本誤醉。或云醉當作碎。今改。

東門行二首。其二。煙洲何客釣寒魚。洲原本誤州。今改。

吳姬曲五首。其三。錦段金錢落如土。錦原本誤錄。或改錦。今從之。段誤段。案段即假借本字。今改。土誤上。

或改土。今從之。其五。潮光燭影紅輝輝。案第一首有湖花句。此潮光疑作湖光。

正仲復有倒和春愁曲之作。依次奉荅。忽得君家遣愁具。具原本誤興。或改具。行人欲歸。痿思起。思誤

念。或改思。鳥雀應門蓬柱宇。應誤鷹。或改應。今並從之。爛醉佯狂白雲谷。佯誤徉。今改。

南山下行。蔽膝尙著長孺袍。案後贈趙子實詩。幅巾大帶長襦袍。孺作襦。說文。襦。短衣也。釋名。襦。奕也。言

溫奕也。急就篇注。短而施要曰襦。襦既衣名。其制又短。言襦。又言袍。言長。似不文。韻府載長襦袍。直引

此詩作襦。不更詳所出。若長孺。則人名。漢汲黯。韓安國。並字長孺。急就篇又有伊長孺。後漢書。馬援傳

有儀長孺。齊書。顧歡傳。同郡顧黯。字長孺。與袍無涉。姑各仍之。

壽陳貴白但有聲牙佶屈村田詩聲原本誤孳屈誤偃君不見南方最麗五色龜誤最今並改。

碧桃花歌歌原本作敏案敏音詩說文吹也一曰笑意此當是歌字誤文今改。

積雨小霽喜袁太初舒叔恭兩生至霜蔬處處稀尙摘蔬原本誤蔬今改。

仇山圖注爲仇仁近作仁近原本作近仁案八卷有仇仁近詩序二十卷有仇仁近真贊作近仁誤今改。

卷第二十九

和鄧善之秋興二首揚雄識字苦揚原本誤楊今改西嶺栽花屋嶺誤山或改嶺今從之伴狂覓耆

舊伴誤詳今改。

客遊原本酒醒下空二字今仍空。

十二月二十三日華亭小泊不憚往來遨遨原本誤遊或改遨案依韻當作遨今從之。

喜王丞病較較疑誤詩命強容有醫容原本誤客或改容今從之。

又作散愁原本家兵潰後上空一字今仍空。

久客且歸留別郭于昭憲掾坐有誇羊酪羊酪原本作年酪案說文酪酏醉也年酪不文與下馬鞍亦不

對當是羊酪之誤世說陸機詣王武子武子前置數斛羊酪指以示陸曰卿江東何以敵此正合坐誇

之義今改。

宿趙睪丞家擢藏名字在字原本誤自或改字今從之疑作氏。

送徐生仁榮侍親遊山歸來佇新語。佇原本誤停。或改佇。今從之。

簡王元剛併寄意王理得君玉。少待意何如何。或改何如何。今從之。

題陳秀才溪山佳趣。花須爛漫栽。栽原本誤開。與末煙霧眼中開韻複。今改。

趙孟樞修職挽詩。樞原本誤種。案字書無樞字。當是樞字譌文。樞同樗。今改。辦得從容死。辦誤辨。或改

辦。今從之。

送穹上人還里。原本禪外五下空二字。今仍空。

舟過嚴州。冰泉滂滂懸。冰原本誤水。或改冰。今從之。

梅山山是化人開。是原本誤寺。或改是。今從之。

劉正仲至寶山不值主人而去。次韻奉寄。原本日月松間過下空二字。今仍空。

辛卯除夜醉眼看梅霧淞天。淞原本漫漶。或改淞。案松江後人加水旁爲淞江。爲吳淞。與淞異。攷玉篇。欠部。淞。凍落也。廣韻三鍾同字林。淞。凍洛也。寒氣結木如珠。見峴乃消。齊魯謂之霧淞。是字當从欠旁。或

改誤。今改淞。

過清涼寺王參預墓下。一庭花木自青春。自原本誤目。或改自。今從之。

於杭州九月送袁太初赴寧海教官。原本青藜曾下空一字。今仍空。

卷第三十。

寒食落魄暖春爲麥地。魄原本誤鬼。或改魄。今從之。

四明山中逢晴。莎坂南風兩蛤出。兩原本作寅。案蛤有蜻蛤、螟蛤。無寅蛤連文。此與下一禽爲對。當作兩

蛤。兩與寅字形相涉而誤。梨花無數繞巖間。梨原本誤黎。今並改。

辛亥歲七夕。醉陪諸公登西湖竹閣。十年浪走紅塵道。十原本誤十。或改十。今從之。

次韻東魯省遊石龜山。百榼頻空看少俊。頻原本誤頻。或改頻。今從之。

舒子俊見過。歲儉魚鮭難猝致。儉原本誤險。或改儉。今從之。

鄞塘田家。髯公鼻息晝如雷。鼻原本誤劓。或改鼻。今從之。

贈屋西小陳秀才。等閒輒贈兩兔穎。輒原本誤輟。其二二誤三。今並改。

謝鄰友陳仲學秀才惠王芎苗二首。坊州杜若自堪羞。坊州或云當作芳洲。案夢溪筆談云。貞觀中。敕下

度支求杜若。省郎以謝朓詩云。芳洲采杜若。乃責坊州貢之。當時以爲笑。詩本此。或說非。

過姑蘇。挂帆安坐過姑蘇。挂原本誤桂。今改。

五雲山圖。一點漁舟帶暝還。暝原本誤瞑。今改。

雨中過泉教張子開。數聲疎雨雪來初。來初原本誤初來。或改來初。今從之。

次韻蒼鄰友近況六首。其一。麥花淡白菜花斑。斑原本誤班。今改。其四月。明人語紙槽東。槽誤糟。或改

槽。其五。村酒沾唇頻得醉。醉誤酒。或改醉。今並從之。

中華民國二十四年十二月初版

撰 者 戴 表 元

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

王雲五主編
叢書集成初編
剡 源 集
附 札 記
八 冊

（本書校對者 龍旭光 徐壽齡 楊瑞文）
陸

